

---

## ■ QUARTA LINGUA

---

# Aids – e tuts taschan

**(cp) Venderdi, ils 3 da favrer, a las 19.30 preschenta la Quarta lingua il toc Aids – e tuts taschan. Quel arranschament ha lieu en il teater Stok, Hirschengraben 42, a Turitg.** Otto Ganz, emploià da banca e bab da famiglia, va en il spital a dar sang. Là vegn el confruntà cun la diagnosa HIV-positiv. Pli tard mora el dad Aids. En il center da l'istorgia stat Ursula, sia dunna. Ursula patescha en il zuppà, ella s'isolescha e va bunamain a la malura perquai che la malsogna vegn taschentada. Il toc mussa co ch'ina famiglia tut normala vegn en ina situaziun desperada ed en l'isolaziun e co ch'ella po la finala sa deliberar da quella.

Il monolog da teater è vegnì represententà per rumantsch grischun l'emprima giada l'avust 2005 a chaschun dal Festival dal teater rumantsch a Vuorz. La premiera dal toc, scrit da l'anteriur plevon e spiritual da praschun Robert Heinrich Oehninger da Winterthur, ha gì lieu il 1997 en il Kellertheater a Winterthur.

### **L'emprim toc en rumantsch grischun**

*Lina Frei-Baselgia* è creschida si a Lantsch e viva oz a Tusaun. La scolasta primara fa part da la truppa da teater laica «Muntanellas» da Cazas/Tusaun ([www.muntanellas.ch](http://www.muntanellas.ch)). Il monolog è l'emprim toc da teater da las Muntanellas en rumantsch grischun. Ina versiun tudestga dal toc ha Lina Frei interpretà la fin dal 2003 en la clinica Beverin. Per la musica segna *Franco Mettler*, la reschia fa *Philipp Lenz*.

**Il teater stok cuntansch'ins cun il tram 3/bus 31 fin «Neumarkt» – duas fermadas davent da la staziun principala. L'avertura da las portas è a partir da las 19.00. A partir da las 20.15 datti ina discussiun informala ed in aperitiv a la bar da teater. L'entrada custa inclusivamain l'aperitif 20 francs.**